

POSICION INSTITUCIONAU



Eth Parlament ei era institucion que represente eth pòble de Catalonha, era quau causa lo place en ua posicion centrau en sistèma institucionau der autogovèrn de Catalonha.

Era nacion catalana s'a anat hènt en cors deth temps damb es aportacions d'energies de fòrça generacions e de fòrça tradicions e cultures qu'an trobat ua tèrra d'acuelhuda.

Catalonha, en sòn procès de bastiment nacionau, a exprimit era voluntat d'èster e de contunhar auançant ena reconeishença dera sua identitat collectiva e en perfeccionament e ampliament der autogovèrn, e per açò ei constituïda en comunitat autonòma, d'acòrd damb era Constitucion espanhòla deth 1978 e damb er Estatut d'autonomia, qu'ei era sua norma institucionau basica. Era Generalitat ei eth sistèma institucionau en qué s'organize politicaments er autogovèrn de Catalonha. Es poders dera Generalitat emanen deth pòble de Catalonha e s'exercissen d'acòrd damb çò qu'establisson er Estatut e era Constitucion.

Er autogovèrn de Catalonha s'exercís enes matèries especificades per Estatut. Enes casi en qué aguestes matèries se definissen coma exclusives, ne corresponen ara Generalitat, de manèra intègra, era potestat legislatiua, era potestat reglamentària e era foncion executiva. En d'auti casi, es competències dera Generalitat son compartides e era legislacion de Catalonha s'a de hèr en marc des bases establides per Estat, e en d'auti casi sonque execute era legislacion emanada der Estat.

Er Estatut configure era Generalitat coma ua entitat complèxa integrada peth Parlament, era Presidència dera Generalitat, eth Govèrn e es autes institucions (eth Conselh de Garantides Estatutàries, eth Sindic de Grèuges, era Sindicatura de Compdes e eth Conselh der Audiovisuau de Catalonha). Es municipis, es vegueries, es comarques e es autes entitats locals qu'es leis determinen intègren tanben eth sistèma institucionau dera Generalitat, coma entitat enes quaus aguesta s'organize territoriauments, sens perjudici dera autonomia respectiva.